

Zhang Yimou zuzendari txinatarrak uko egin dio Cannesen lehiatzeari

Bere filmak politikoki erabiltzea egotzi dio Mendebaldeari

Erredakzioa / Donostia

Zhang Yimou zinema zuzendari txinatarrak talentuaz gain karakterra ere badu. Cannesko jaialdian aurkeztu behar zituen bi filmak ez erakustea erabaki du Yimouk, jaialdiko zuzendari Gilles Jacob-en jarre-

rarekin haserre. Bere filmekin Mendebaldeak egiten duen «erabilera politizatua» salatu du Yimouk. «Zuentzat Txinako filmak gobernuaren aurkakoak dira, edo bestela propaganda hutsa», adierazi du Yimouk Cannesko jaialdiko zuzendariari igorritako gutunean.



Zhang Yimou
zinema
zuzendaria.

IKOR KOTX

GILLES JACOB-EN adierazpen batzuek sortu omen dute Zhang Yimouren haserre. Antza, Cannesen aurkeztu behar ziren Yimouren azken bi filmak Pekingo gobernuaren propagandarako plataforma gisa baliatuko zirela adierazi zuen Jacobek jendaurrean, Txinako zuzendari handiak idatzi eta Pekingo *Gazteriaren Egunkaria*-k argitaratutako gutunak dioenaren arabera.

«Uste dut ez dituzuela nire filmak ondo ulertu, irizpide politikoen arabera epaitzen baitituzue. Bi mailatan banatzen duzue Txinan egindako zinema: Txinako Gobernuaren aldekoa eta kontrakoa. Ez badira gobernuaren kon-

trakoak, propaganda hutsa dira», esaten dio Yimouk Jacobi idatzian. «Ezin dut onartu Mendebaldeak politizatu izana nire filmak denbora askoan zehar», gaineratu du. Hori dela eta, Cannesko jaialdian parte hartzeari uko egin dio Yimouk, eta Txinako zinemaren diskriminazioari amaiera emateko eskatu du.

Ezta bat gutxiago ere eta Mongolia barrualdeko amodiozko istorioa dira Yimouk Cannesen aurkeztu behar zituen bi filmak. Zurrumurruen arabera, bat sail ofizialean erakutsiko zen eta beste *Un certain regard* sailaren barruan. *Ezta bat gutxiago ere* filmak nekazari herrietan haurrak hezteko dauden zail-

tasunak ditu hizpide, eta profesionalak ez diren aktoreekin errodututa dago.

Txinako zinema zuzendariarik ospetsuena da Zhang Yimou. Sariak irabazi ditu Venezia, Cannes eta Berlingo jaialdietan. 1997an Donostiako Zinemaldiko epaimahaiko partaide izan zen, eta *Keep cool* filma aurkeztu zuen Zabaltegi sailean.

Cannesko jaialdiko zuzendaritzak ez du oraindik ezer esan Yimouren erabakiari buruz. Beharbada gaur entzungo dira lehen erreakzioak, maiatzaren 12an hasiko den jaialdiaren sail ofizialean parte hartuko duten filmak ezagutzera emango baititu antolakuntzak.

laburrean



ARTXIBOKOA

Albitaren kantu berriak Basaurin. Albita abeslari kubatarrak *Corazon abierto* disko berriko kantuak aurkeztuko ditu bihar, Basauriko Social antzokian. Miamin finkaturiko kantariak musika kubatarren alde komertzialena ordezkatzeko du, Gloria Estefanen ildo berean. Ikusgarritasunean, moldaketetan eta ahotsean oinarrituriko saioa eskainiko du 20:00etatik aurrera.

Z I N E M A

■ **Sarobe zentroan egindako 'Merry Chrispas' film laburrak saria jaso du Mallorcako Nazioarteko Jaialdian**
URNIETAKO Sarobe Arte Eszenikoetako Zentroan egindako film labur batek, *Merry Chrispas*, 16 milimetrotan egindako lan onenaren saria jaso du Mallorcako Palmako Film Laburren Nazioarteko Erakustaldian. 1997-98 ikasturteko ikasleek praktika saioetan egindako filma da *Merry Chrispas*.

■ **Mastroianniren alarguna hil da**
FLORA MASTROIANNI, Marcelo Mastroianniren alarguna, astelehen gauean hil zen, 72 urte zituela, gaixotasun luze baten ondorioz. Antzerki eta zinema aktorea izan zen Flora Mastroianni (ezkongabeko izena Flora Carabella zuen), eta Luchino Viscontirekin lan egin zuen.

■ **Bertolucciren film berria hilaren 30ean estreinatuko da**
BERNARDO BERTOLUCCI zuzendariaren *Besieged* film berria hilaren 30ean estreinatuko da Espainian. David Thewlis eta Thandie Newton dira protagonistak, eta gizon-geles barnekoi batek aterpetzen duen ikasle afrikarrekin duen harremana azaltzen du.

M U S I K A

■ **Suede, Mercury Rev eta Massive Attack, Benicassimen**
SUEDE, Blur, Massive Attack, Chemichal Brothers eta Mercury Rev dira aurten Benicassingo musika jaialdian (Castello, abuztuak 6-8) parte hartuko duten talde nagusietako batzuk. Bis, Black Box Recorder, Hefner, Arab Strap, Ultrasound, Kula Shaker, Stereophonics eta dEUS ere jaialdian izango dira, beste askoren artean.